

嘯
亭
雜

錄

第三冊

進步書
局校印

清禮親王昭棟著



嘯亭雜錄卷之八

清 汲修主人著

內務府定制

自古宮禁服御飲食燕好必須有專司之者。惟周禮分設各官統屬冢宰。所以合宮府為一體。其制實為良美。後世人主皆委宦寺掌之。故閻人得以專擅。因之越俎犯章。干預國柄。皆因督御僕夫不得其人故也。我朝龍興之初。創立內務府。以往昔之舊僕專司其事。入關後復以明三十二衛人附麗之。凡內廷之會計。服御物飾。宮御武備等。皆統屬於內務府大臣。紀綱嚴肅。與周制統屬於冢宰之制相符。其閻人寺宦。則惟使之供給洒掃之役。毋得任事。將漢唐宋明歷代諸弊政。一旦廓而清之。其法度之精詳。規模之宏遠。尤為超越千古矣。其職掌廣儲司。凡庫有六。曰銀庫。曰緞疋。曰衣庫。曰茶庫。曰皮庫。曰瓷器庫。各有專司。惟茶庫兼收人參。為六庫中之最要。初名御用監。順治十八年。改設專司焉。其初本府進項不敷用時。檄取戶部庫銀以為接濟。乾隆中上親為裁定。汰去冗費若干。歲支用六十餘萬兩。其後歲為盈積。反充外府之用。較諸明代。每勒取金花銀兩。徒充閻人之囊橐者。真不啻霄壤。

之別也。會計司掌領皇莊田畝諸事。田地各有等第。盛京莊八十有四。一等莊三十五。二等莊十。三等莊八。四等莊三十四。山海關外莊二百十有一。一等莊六十六。二等莊四。三等莊二十。四等莊百二十一。喜峯口古北口外莊百三十八。均一等歸化城莊十有三。畿輔莊三百二十有二。一等莊五十七。二等莊十有六。三等三十八。四等二百十有一。半莊七十一。每莊設莊長一人。瓜田菜圃置長亦如之。莊賦共地一萬三千二百七十二頃八十畝有奇。賦糧九萬三千四百四十石。菽二千二百二十五石。芻八萬一千九百四十束各有奇。凡編比壯丁每三年一次。盛京及關外口外各莊由總管將軍都統等畿輔由府委官各具冊於府由府彙冊奏聞。凡皇子分封各按爵秩給以莊地人丁。公主郡主贈嫁亦如之。選宮女於內府。三旗佐領內管領下女子年十三以上者造冊送府。奏交宮殿監督領侍等引見。入選者留宮。餘令其父母擇配其留宮之女至二十五歲遣還擇配凡收錄內監由禮部冊列姓名籍貫移府。總管太監察其來由無異乃委年老內監一人驗實具奏候旨分撥。年老者聽其回籍為民。凡支領內監月費執事人匠役餼廩皆隸之掌儀司。凡饗奉先殿之禮於大內景運門之東建奉先殿。朔望瞻拜時節薦新生忌祭享。

出入啟告。以展孝思。前殿後殿均九間。中為穿堂。以聯前後。繚以周垣。供奉列聖。列后神牌。凡朔望。萬壽聖節。元正冬日。及國有大慶。均恭奉。列聖補牌。前殿祭饗禮成。還御。後殿寢室。其禮儀祭器。一如太廟之制。惟不設牲俎。不行飲福受胙禮。王公不陪祭。其樂名貽平。敷平紹平。光平義平諸名。異於太廟之奏。其遣官行禮亦與太廟儀同。凡遇列聖。列后諸聖誕忌辰。及元宵清明中元霜降歲除等日。於後殿行禮。神位前設有燈酒脯果實焉。壽皇殿尊奉仁皇帝。憲皇帝。純皇帝御容。凡遇聖誕及忌辰。皇上躬率諸皇子及近支王展謁行禮。其歲時奠獻。一如事生儀。凡燕外藩之禮。歲除及正月十五日。賜外藩蒙古宴。奏請欽命進酒大臣內管領備筵九十席。宴於保和殿。及正大光明殿。屆時鴻臚寺理藩院引蒙古王公台吉入領侍衛內大臣。序王公班次。八旗一二品武職亦預焉。皇上陞殿奏隆平之章。蒙古王公武大臣各就席。行一叩禮。座尚茶。正升邇。御筵降迺進茶。丹陛清樂作。奏海宇昇平之章。尚茶正率侍衛等舉茶案。由中道進至檐下。正中北嚮。跪注茶於碗。進茶大臣奉茶入中門。羣臣皆就本位跪進茶。大臣由中陛升至。御前進茶。退立於西。上飲茶。與宴之臣

僚咸行一叩禮。進茶大臣跪受茶碗。由右陞降出中門。衆皆坐。侍衛等分賜與宴臣僚茶。皆於本位一叩。飲畢復行一叩禮。尚茶正微茶案退樂止。展席幕乃進酒。如進茶儀。進酒大臣出尚膳正率尚膳進膳殿廷清樂奏萬象清寧之章。尚膳正奉旨分賜食品於各席遍。樂止奏慶隆舞揚烈舞儀見後卷以次畢。殿內奏喜起舞畢。

上簡召王公大臣賜酒羣臣咸跪受一叩卒飲。朝鮮國俳進百伎並作退。尚膳正升徹。御筵降。與宴之王公大臣等謝宴。行一跪三叩禮。丹陛大樂作奏治平之章。

皇上還宮。鴻臚寺理藩院引外藩及百官以次退。皇子成婚。公主下嫁。設宴其邸。與內廷宴同。凡皇子婚禮。先期移文欽天監諏吉以聞。乃命夫婦偕老之大臣傳制曰。以某官女某氏作配。皇幾子為福晉。福晉父率閩族謝恩。行三跪九叩禮。擇吉簡內大臣侍衛隨。皇子詣福晉家行定親禮。福晉父率閩族綵服迎於大門外。延皇子入至正寢。於福晉父母前行三叩禮畢。皇子回宮。福晉父率族人送大門外。諏吉行納采禮。以內務府大臣宮殿監督領侍充使及門。福晉父迎入中堂謝恩。行三跪九叩禮。與宴大臣陪福晉父及族人之在宮者。宴於中堂。內務府命婦女官同陪女眷宴於內室畢。內務府大臣暨宮殿監督領侍回朝復命。成。

婚先一日。皇子於皇上皇后前行禮。福晉母率諸婦至皇子所居宮中。設牀帳粧奩。工部於宮門及皇子所居宮門。皆縣綵。居吉時於皇子宮設錦褥二。東西嚮設酒饌案於前。置兩爵兩盞於案。請皇子西面。福晉東面。相嚮行兩拜禮。各就坐。執事者執金瓶。女官以盞爵酌酒。合和以進。皇子與福晉皆飲。乃進饌。酒饌三行。皇子與福晉皆起。仍行兩拜禮。撤饌案。次日。皇子偕福晉朝見。皇上皇后。女宮二人。引皇子居左稍前。行三跪九叩禮。福晉居右稍後。行六肅三跪三叩禮。公主下嫁亦如之。王公之女。奉旨授為和碩公主郡主。暨宗女撫養。中宮者。其下嫁之禮。各視爵秩。以別差等。筵宴會禮部辦理。其進時憲書進春牛。皆如禮部儀。凡妃嬪大事。皆會禮工二部按例遵行。都虞司掌內府兵衛等事。凡訓練內府護軍驍騎。歲以春秋二季。由該管官督率操演。各賞罰有差。凡宿衛。大內護軍統領宿。神武門內掌順貞門鑰。其大內後複道中。皆內務府護軍直宿。其直宿西華門北者。合護軍驍騎步軍。及三旗服役人。鑾儀衛校尉別立班次。曰防範兵。專司戒火。凡皇后內廷主位出入。以內務府總管。或散秩大臣一人。司官八人。內府護軍統領一人。護軍參領四人。護軍校十人。率護衛豹尾班執鎗者十人。佩儀刀。

者十人。翊衛護軍百人。導引扈從。皇子福晉出入。遞減騎從。凡畿輔行宮京東七處。京西四處。京北六處。口外十三處。各設千總若干人。分隸湯山盤山黃新莊熟河各總管管轄。凡捕牲烏喇官弁亦隸屬焉。慎刑司專理太監蘇拉等詞訟。凡審讞內府所屬人犯罪在杖一百以下者。本公司依律議結。杖以上者。皆移送刑部定擬。如事干宮禁者。請旨鞫問。凡內監私逃。按其次數分別自首被獲。治以枷杖之罪。營造司。凡匠役均有定額。內府所屬人在官執藝者。於佐領管領下選取。招募民匠。於工部咨取。又設司匠領催以督率之。缺則取補。惰則革除。凡修造紫禁城內工程。小修大修。建造皆會工部。大內繕完由內監匠人。皇城牆垣有應修理者。奏交工部。均由欽天監諭吉興工慶豐司。凡牧所定額設。內三圈於西華門外。養扇牛十有二。格牛六。牡牛三。青牛一。乳牛無定數。設三外圈於南苑。設羊六圈於豐臺。設牛羊羣牧於張家口外。各牧所牛羊。均由該管官烙印。凡典牧。設廐長廐副若干人。廐丁司収等夫。以遞增減。口外牧羣設總管一人。副管二人。牛羊羣協領牧長牧副牧丁若干人。隸張家口外總管管轄。大凌河牛羣隸盛京將軍管轄。凡

郊廟祭祀皆用廐牛馬。凡出牧歲以三月十五日後四月初一日前。均於南苑

寬開豐草之處牧放。停止芻菽。以九月二十日後。十月初五日前。各歸原圈嗣養。凡勸懲內外各圈。視牛犢斃損之多寡。以別功過。游牧諸羣每三牛。三年孳生一犢。三年孳生二羔。於定數內缺少者治罪。定數外孳生者。由該總管奏聞。上駟院。凡圍牧設內廄於皇城外。廄於南苑設牧羣於盛京及張家口外。以畜馬蕃庶。籍其數而領之。凡出牧懲勸稽查。與慶豐司牛羊同。凡供直馬以內廄御馬四。齊其毛具鞍轡。立院門外。行幸駐蹕。以御馬六。立圈門右。如之凡遇車駕巡幸日。以十馬備上乘御。由內院大臣奏請於御馬內。簡其尤良者。以從其需用。駕車馬公馬及橐駝之數。附疏以聞。其扈蹕之各執事官役內監所乘之馬。由所司行院。如數以公馬撥給。凡禫馬歲春秋二祭禱馬於神。繫帛於御馬鬚尾以為識。凡三十五匹。附養四色馬四十匹。令祭堂子率以十四。詣神前受釐。繫絲帛亦如之。奉宸院掌御園亭河道。南苑西山稻田諸事。凡網戶沙河二十六人。霸州四十六人。江南六人。歲給銀米有差。其河道應通濟者。知會工部修理。凡稻田玉泉山十有五頃。供上方玉食餘田三十餘頃。皆徵租賦。御河三海諸處歲各有蓮藕之租。均量地薄征以供。內庭蒔植花卉之用。武備院掌上甲胄弓矢兵仗。及鞍轡行

帳諸事。凡御蓋。皇上御殿設繡蓋。巡幸鹵簿。設黃羅銷金九龍三檐曲柄華蓋。凡設褥。上春冬用黑貂。夏秋用黃龍綺。均於換季日更易。凡兵仗皆由院敬謹修造。御用弓矢皆選盛京之良楳磐石成造。凡採辦物料。歲支崇文門稅務銀千兩。交各省敬謹採辦。以上皆內府之所專司。若內務府大臣得人。則宮府之禁暴嚴紀。綱整肅實為超軼漢唐諸制多矣。

堂子

國家起自遼瀋。有設竿祭天之禮。又總祀社稷諸神祇於靜室。名曰堂子。實與古明堂會祀羣神之制相符。猶沿古禮也。既定鼎中原。建堂子於長安左門外。建祭神殿於正中。卽彙祀諸神祇者。南向前為拜。天圓殿殿南正中設大內致祭立杆石座次。稍後兩翼分設各六行。行各六重。第一重為諸皇子致祭立杆石座。諸王貝勒公等各依次序列。均北向東南。建上神殿南向。相傳為祀明將鄧子龍位。蓋子龍與太祖有舊誼。故附祀之。歲正朔。皇上率宗室王公滿一品文武官詣堂子行拜天禮。凡立杆祭神於堂子之禮。歲以季春季秋季月朔日舉行。祭日懸黃幡。繫采繩綴五色繒百縷。楮帛二十有七。備陳香燈。司俎官於大

內恭請 神位由 坤寧宮以綵亭昇出行中路至 堂子安奉於祭 神殿內東向陳糕餌九盤酒殘三 圓殿陳糕餌三酒殘一。楮帛如數。司俎官以贊祀致辭行禮。大內致祭後越日為馬祭 神於堂子如儀。凡月祭孟春上旬三日餘月朔日。大內遣司俎官率 堂子官吏於 圓殿奠獻糕酒行禮如儀。是日內管領一人。於 上神殿獻糕酒楮帛。親郡王各遣護衛一人於 上神殿獻楮帛。凡浴佛之禮歲以孟夏上旬八日。司俎官率執事人等自 大內請佛至 堂子祭 神殿陳香燈獻糕酒。王公各遣人獻糕執事設盥盤替祀二人浴佛畢六酌獻三致禱如儀。是日 大內及軍民人等不祈禱不祭神禁屠宰不理刑名。凡出師展拜 堂子之禮。皇上親征如 喬爾丹事仁皇帝諱吉起行。內府官預設 御拜禱於 圓殿外及內門外御營。黃龍大纛前。兵部陳螺角鑾儀衛陳鹵簿均如儀。皇上先詣 圓殿次詣纛前。均行三跪九叩禮。六軍凱旋。皇上入都門先詣 堂子行禮。命將出師。皇上率大將軍及隨征將士詣 堂子行禮。儀均與 親征同。凱旋日詣 堂子行告成禮。均與古之禡禱告功明堂之禮相同。實 國家祈禱之處。百神之所佑庇。與商周之制。若合符節。所以綿億萬載之基也。

額經略

額經略爾登保吉林人少以侍衛從福文襄王征臺灣廓爾喀苗疆諸部落有功存

至護軍統領楚苗之役公受瘴得疾時福文襄和宣勇相繼卒亦有傳公已故者其

家已為之設位祭久之始知其訛嘉慶己未冬授經略督辦三省教匪公雖武人為

富尚書德甥故夙知兵法待下過嚴厲然遇有功者必親為撫視又延胡學士必顯

為幕客凡出師皆請其參酌故每戰必勝賊皆畏懼聞慶總憲溥言公行師川楚時

如數日不遇賊則抑鬱不樂鞭撻士卒不凸聞鼙鼓聲卽踴躍據鞍指揮三軍欣然

從事及凱師歸公必命烹肥羊呼衆將士至邀與同食公親持刀為之割削視諸將

如骨肉言語質朴如違其制則當筵謾罵初不少貸一日游總兵雲棟違公節制至

敗衄公罵之曰汝何畜產乃敢違乃公令以致敗辱如楊遇春小兒斷不致若此時

楊方在坐而公初不顧忌其真率也若此故人皆為之用命甲子春歸朝任御前

大臣余於朝廊遇之高不逾中人性和藹初不意其勇烈若此也乙丑秋病篤時

上遣莊親王往視王嘉其勲績公瞪目曰吾有何功可計殊愧死矣其謙冲又如此

然性好殺戮擒賊至無論老稚盡皆殲滅嘗曰毋留比賊種致他日更生事變也故

卒無嗣。人皆為之惜云。

札克塔爾

札克塔爾。金川番部人。其父某為索諾木所殺。故公自弱冠投誠。因秘獻入番捷徑。阿文成公得以進兵成功。純皇帝念其幼稚。命近臣撫視之後。游至護軍統領。公雖外夷。性敏捷。川楚之役。公每膺師旅。未嘗敗北。軍中敬畏之。呼曰苗張。無敢櫛其鋒者。丙寅秋瓦柴關兵變。公首趨赴。時西安駐防兵已為賊冲潰。勢甚猖獗。公怒馬獨出。手殺數賊。賊有識之者。說曰。苗張至矣。因皆奔潰。楊時齋提督繼至。為之撫慰。賊皆棄甲請降。是役往返不踰二十日。皆二公之功也。壬申春病卒於邸。上悼惜之。賜金幣。令人董其喪焉。

西山活佛

乾隆乙巳丙午間。有順義民婦張李氏。善醫術。兼工符籙。祈禱之事。病者服其藥。輒瘥。又有宦家婦女。為之延譽。爭建西山三教庵。西峯寺與之居。度為供奉。號為西山老佛。後燒香者既衆。男婦雜沓。頗有桑間濮上之疑。為有司所懲治。將張李氏伏法。其風始熄云。

法和尚

乾隆中有法和尚者。居城東某寺。勢甚薰赫。所結交皆王公貴客。於寺中設賭局。誘富室子弟聚博。又私蓄諸女伎。日夜淫縱。其富踰王侯。人莫敢櫻。栗毅公阿里哀惡。其壞法。乃令番役陰夜踰垣擒之。盡獲其不法諸狀。阿恐獄緩。為之緩頰者衆。乃遍集諸寺僧寮。立斃杖下。踰時要津之托始至。已無及矣。人爭快之。至於市井間。繪圖鬻之。久之未已也。

阿里瑪

國初有驍將阿里瑪者。能自握其髮足懸於地。又能舉盛京實勝寺之石獅。重踰千斤。戰功甚鉅。入京後所為多不法。章皇帝欲置於法。恐其難制。有巴圖魯占者。其勇亞於阿。因命其擒之。占至阿邸。故與之語。猝握其指。阿怒以手拂占。擲於庭外。數十武。因數之曰。汝何等人。乃敢與吾鬪勇耶。占以上命告。阿笑曰。好男兒。安惜死焉。何須用紿計也。因受縛坐車中。赴市曹。至宣武門。阿曰。死則死耳。余滿洲人。終不使漢兒見之。誅於門內可也。因以足絆城門甕洞間。車不能行。行刑者從其語。阿延頸受戮。其頸脉如鐵。刀不能下。阿自命占以刀割其筋。然後伏法。亦一奇男子也。

三焦

醫家載十二經之脉。其所言手少陽三焦者。人莫能指其定處。諸醫家或分上中下三俞為三焦。以敷衍之。然六陽經絡。皆為六腑之所繫。故命為陽。未可統指。背俞謾無定所。蓋三焦男子藏精之處為腎。臟之外腑。腎賦形有二。故膀胱三焦分為其腑。即命門之關鍵也。或有被磔刑者。見其膀胱後別有白膜包裹精液。此即三焦之謂也。世之盲醫不察。而妄相指擬。致使十二經之名。殊缺其一。亦古今行醫者之所宜曉也。

秦腔

自隋時以龜茲樂入於燕曲。致使古音湮失。而番樂橫行。故琵琶樂器為今樂之祖。蓋其四絃能統攝二十八調也。今崑腔北曲。即其遺音。南曲雖未知其始。蓋即小詞之濫觴。是以崑曲雖繁音促節居多。然其音調猶餘古之遺意。惟弋腔不知起於何時。其鎣鉸喧聞。唱口囂雜。實難供雅人之耳目。近日有秦腔。宜黃腔。亂彈諸曲名。其詞淫穢猥鄙。皆街談巷議之語。易入市人之耳。又其音靡靡可聽。有時可以節憂。故趨附日衆。雖屢經明旨禁之。而其調終不能止。亦一時習尚然也。

王樹勲

王樹勲。江都人。其父某曾任微職。樹勲幼入京應試不售。乃於廣慧寺為僧。法名明心。性聰悟。剽竊佛氏絮語。以為直通圓覺。又假扶乩卜筮諸異術。京師士大夫多崇信之。樹勲以重賄賂諸人之間者。故多探刺其陰私事。而揚言於外。故人愈尊奉之。蔣予蒲龐士冠等。以詞垣名流。甘列弟子之位。其餘達官顯宦。為其門人者無算。朱文正公。正人也。亦與之談晤。其他可知矣。為和相所訪攀。樹勲復以重賄賂司員吉倫。為之袒護。因末減其罪。勒令還俗而已。樹勲後游蕩江湖間。時值川楚教匪倡亂。松相公筠時督師湖北。樹勲仗策軍門。松公故喜佛法。樹勲投其意旨。公大賞鑒。因命易裝為道士。入某寨中說賊降。公大悅。獎以七品官銜。樹勲復從軍數載。積功至襄陽太守。嘗入都引見刑部尚書金光悌。貪吏也。因其子病劇。延樹勲醫治。樹勲忧以禍福。光悌至。長跪請命。人聞傳為笑談。為御史石公承藻。登諸白簡。上下其章。訊之得實。上獎之曰。真御史也。因褫樹勲職。遣戍黑龍江。光悌以先物故。得免置議。蔣予蒲宋鎔等黜降有差。夫樹勲以一浮蕩僧人。乃敢以口舌干請諸大僚。為之薦引。致身二千石之貴。其雖遭遣戍謫死窮荒。不無厚幸。諸名士以翰墨名流。而

甘為縑衣弟子。以至遭其笞撻之辱。亦可謂斯文掃地矣。

畫眉楊

京師有善作口伎者。能為百鳥之語。其效畫眉尤酷似。故人皆以畫眉楊呼之。余嘗見其作鸚鵡呼茶聲。宛如嬌女。窺窗又聞其作鸞鳳翹翔。戛戛和鳴。如聞在天際者。至於午夜寒鷗。孤牀蟋蟀。無不酷似。一日作黃鳥聲。如覲睨於綠樹濃陰中。韓孝廉崧觸其思鄉之感。因之落涕。亦可知其伎矣。

魏長生

魏長生。四川金堂人。行三。秦腔之花旦也。甲午夏入都。年已逾三旬外。時京中盛行弋腔。諸士大夫厭其囂雜。殊乏聲色之娛。長生因之變為秦腔。辭雖鄙猥。然其繁音促節。嗚嗚動人。兼之演諸淫穢之狀。皆人所罕見者。故名動京師。凡王公貴位。以至詞垣粉署。無不傾擲。纏頭數千百。一時不得識交魏三者。無以為人。其徒陳銀官。復鬢齡韶秀。當時有青出於藍之譽。長生既蓄厚貲。乃抽身歸里。陳遂繼其師業。當時百官殷富。習俗奢靡。故二子得以媚取。為和相所覺察。因荷校銀官於緹帥署前。以辱之。為緩頰者。皆謫貶有差。乃逐陳銀歸川中。其風稍息。銀官不知所終。嘉慶辛酉。